

Na osnovu člana 61. stav (2) Zakona o upravi („Službeni glasnik BiH”, br. 32/02, 102/09 i 72/17) i člana 13. stav (1) Pravilnika o uvjetima nabavke i načinu korišćenja službenih vozila u institucijama Bosne i Hercegovine ("Službeni glasnik BiH", br. 26/14, 81/14, 78/15, 42/17, 53/17, 62/17, 34/18, 5/19, 81/19, 54/20 i 80/20) i saglasnosti Vijeća ministara Bosne i Hercegovine, datoj na 56. sjednici, održanoj 26. 10. 2022. godine, generalni direktor Direkcije za civilno zrakoplovstvo Bosne i Hercegovine donosi

**PRAVILNIK
O UVJETIMA NABAVKE I NAČINU KORIŠĆENJA SLUŽBENIH
SPECIJALIZIRANIH VOZILA DIREKCIJE ZA CIVILNO
ZRAKOPLOVSTVO BOSNE I HERCEGOVINE**

DIO PRVI - OPŠTE ODREDBE

**Član 1.
(Predmet)**

Ovim pravilnikom propisuju se broj, klasa, namjena, uvjeti nabavke i način korišćenja službenih specijaliziranih vozila Direkcije za civilno zrakoplovstvo Bosne i Hercegovine (u daljem tekstu: BHDCA), kao i prava i obaveze lica koji upravljaju službenim specijaliziranim vozilom.

**Član 2.
(Definicija službenog specijaliziranog vozila)**

Službena specijalizirana vozila su vozila koja su u vlasništvu BHDCA i dio su voznog parka BHDCA. U smislu odredbi ovog pravilnika, to su vozila koja se koriste za specijalizirane namjene za izvršavanje poslova i zadataka iz nadležnosti BHDCA i provođenje aktivnosti u skladu sa dužnostima i ovlaštenjima propisanim Zakonom o zrakoplovstvu Bosne i Hercegovine i drugim propisima iz oblasti civilnog zrakoplovstva.

**Član 3.
(Upotreba muškog ili ženskog roda)**

Izrazi koji su radi preglednosti dati u jednom gramatičkom rodu bez diskriminacije se odnose na muškarce i žene.

DIO DRUGI - BROJ, KLASA I NAMJENA SLUŽBENIH SPECIJALIZIRANIH VOZILA

Član 4.

(Broj i klasa službenih specijaliziranih vozila)

BHDCA raspolaže sa ukupno deset (10) službenih specijaliziranih vozila, i to:

a) Niža srednja klasa putničkog vozila nabavne vrijednosti do 40.000 KM

- 1) specijalizirano terensko motorno vozilo – komada (1) jedan,
- 2) specijalizirano putničko motorno vozilo – komada (1) jedan.

b) Niža klasa putničkog vozila nabavne vrijednosti do 25.000 KM

- 1) specijalizirano putničko motorno vozilo – komada (7) sedam,
- 2) specijalizirano terensko motorno vozilo – komada (1) jedan.

Član 5.

(Namjena)

(1) Službena specijalizirana vozila namijenjena su za sljedeće potrebe:

- a) prijevoz inspektora i ovlaštenih lica BHDCA prilikom provođenja stručnog i inspekcijskog nadzora nad radom zrakoplovnih subjekata u različitim zrakoplovnim oblastima,
- b) prijevoz stranih delegacija koje posjećuju BHDCA i prijevoz međunarodnih revizora kada se nalaze u Bosni i Hercegovini prilikom periodičnih kontrola primjene međunarodnih standarda i propisa u civilnom zrakoplovstvu Bosne i Hercegovine,
- c) izvršavanje obaveza BHDCA u slučajevima vanrednih događaja u civilnom zrakoplovstvu i vršenja operacije traganja i spasavanja u slučaju zrakoplovnih nesreća,
- d) vršenje drugih aktivnosti i zadataka u vezi sa sigurnošću letenja (*safety*) i zrakoplovnom sigurnošću (*security*).

(2) Neovisno od stava (1) ovog člana, na osnovu prethodnog odobrenja generalnog direktora BHDCA ili ovlaštene osobe, službena specijalizirana vozila koriste se i za druge namjene kada je to uvjetovano službenim potrebama za obavljanje poslova i zadataka iz nadležnosti BHDCA.

(3) Službena specijalizirana vozila koriste se na osnovu odobrenog putnog naloga.

DIO TREĆI – NABAVKA, PRODAJA I NAČIN KORIŠĆENJA SLUŽBENIH SPECIJALIZIRANIH VOZILA

Član 6.

(Uvjeti nabave i prodaje)

- (1) Nabava službenih specijaliziranih vozila u BHDCA vrši se u skladu sa odredbama Zakona o javnim nabavkama Bosne i Hercegovine i uvjetima propisanim podzakonskim aktima donesenim na osnovu Zakona o javnim nabavkama Bosne i Hercegovine.
- (2) Obavezni kvalifikacijski uvjeti tenderske dokumentacije prilikom nabavke specijaliziranih službenih vozila su:
 - a) obavezna garancija na period od minimalno četiri godine,
 - b) plan održavanja koji uključuje troškove redovnih servisa u periodu važenja garancije, a minimalno za 120 000 pređenih kilometara.
- (3) Prodaja specijaliziranih službenih vozila BHDCA vrši se u skladu sa člankom 12. Pravilnika o uvjetima nabavke i načinu korišćenja službenih vozila u institucijama Bosne i Hercegovine i instrukcijama Ministarstva financija i trezora Bosne i Hercegovine, a uzimajući u obzir stope otpisa, procijenjeni vijek trajanja vozila i trenutnu tržišnu vrijednost vozila.

Član 7.

(Obaveze lica sa pravom korišćenja službenih specijaliziranih vozila)

- (1) Lice sa pravom korišćenja službenog specijaliziranog vozila dužno je da istim pažljivo rukuje i osobno je odgovorno za zaduženo specijalizirano službeno vozilo, njegovo pravilno i namjensko korištenje u skladu sa tehničkim uputstvom proizvođača.
- (2) Lice sa pravom korišćenja službenog specijaliziranog vozila dužno je da vodi brigu o zaduživanju goriva, urednom vođenju i popunjavanju putnih naloga, te da o svakoj uočenoj tehničkoj neispravnosti vozila ili nastaloj šteti na vozilu pismeno obavijesti nadležnu organizacionu jedinicu BHDCA radi preduzimanja potrebnih radnji za njegovo servisiranje i popravku.

DIO ČETVRTI - PRELAZNE I ZAVRŠNE ODREDBE

Član 8. (Primjena drugih propisa)

- (1) Na sva pitanja koja nisu regulirana ovim pravilnikom primjenjuju se odredbe Pravilnika o uvjetima nabavke i načinu korišćenja službenih vozila u institucijama Bosne i Hercegovine ("Službeni glasnik BiH", br. 26/14, 81/14, 78/15, 42/17, 53/17, 62/17, 34/18, 5/19, 81/19, 54/20 i 80/20).
- (2) Ukoliko lice sa pravom korišćenja specijaliziranih službenih vozila, za vrijeme korišćenja vozila, ne postupa u skladu sa odredbama ovog pravilnika i važećih internih propisa BHDCA, pokrenuće se postupak s ciljem utvrđivanja disciplinske odgovornosti i odgovornosti za materijalnu štetu, a u skladu sa propisima kojima je regulirana ova oblast.

Član 9. (Stupanje na snagu i primjena)

- (1) Ovaj pravilnik stupa na snagu danom potpisivanja od strane generalnog direktora BHDCA, a nakon dobijanja saglasnosti Vijeća ministara Bosne i Hercegovine.
- (2) Ovaj pravilnik biće objavljen na zvaničnoj internet stranici BHDCA.

Broj: 1-3-02-2-81-49/15
Banja Luka, 2. 11. 2022. godine

